

Segun minister:

Arubanita lo cambia completo

SANNICOLAS – Despues cu minister di Enseñansa a anuncia cu e siman aki lo cuminsa cu e renobacion y extension di Colegio San Nicolas, e plannan a keda presenta dialuna pe directiva di scol.

Diamars e minister Michelle Hooyboer-Winklaar ta sigui informa riba e ultimo desaro. “Awe atrobe mi por anuncia cu mi a ricibi e diseño final pa fase 2 cual lo ta e renobacion y expansion di Arubanita cual lo ricibi un cambio completamente nobo.

E unico parti di e scol cu lo keda ta e murayanan actual.” E renobacion y ampliacion di Arubanita ta encera en total 3 lokaal completamente renoba, un luga pa docente adicional, bañonan adicional pa maestronan, un ‘reprokamer’, un kantoor adicional pa rectorado y un oficina pa e

scol su trahado social.

Banda di e renobacion di Arubanita tambe a sigura cu lo bin un heki completamente nobo na e edificio di Colegio San Nicolas cual lo aporta na e seguridad di e estudiante y docentenan. Awo e proyecto lo bay pasa e proceso pa ricibi tur aprobacion necesario. Lo haci lo maximo pa por termina e di 2 fase prome cu aña escolar 2015-2016. E enfoko principal ta pa termina e parti di Arubanita y despues e heki, asina e minister ta informa. E masterplan pa Colegio San Nicolas ta encera mas fase, 4 sea 5. E detayenan di e fasenan aki no ta conoci ainda. Locual e minister tambe a priminti cu lo informa e docentenan, alumnonan y mayornan riba e desaroyonan.

Banda di e estado deplorable di e scol, tin otro problemanan menciona tambe. Manera falta di comunicacion entre



e scol, mayornan pero tambe cu Dienst Publieke Scholen cu ta encarga cu e scol avansa. Tambe ta falta un docente Hulandes y su studiantenan lo keda probablemente pa di dos biaha sin cifra riba nan rapport pa Nederlands.

E mayornan tambe ta haya

cu mester bin un evaluacion di docente y tambe ta haya cu docentenan pensionado no tur ora ta asina motiva. Riba pagina A7 den e edicion aki tambe por lesa un reaccion di e sindicato Simar riba e situacion na Colegio San Nicolas. □